

小學考

十三

★

小學考卷三十

資政大夫兵部侍郎兼都察院右副都御史巡撫廣西南康謝啟昆編

聲韻二

蕭氏

鈞韻旨

唐志二十卷

佚

唐書蕭瑀傳曰瑀兄子鈞博學有才望貞觀中累除

中書舍人終太子率更令兼集賢館學士所撰韻旨

一十卷行于代

武氏

元之韻銓

唐志十五卷

佚

唐元宗韻英

唐志五卷

佚

唐書經籍志曰天寶十四載謨集賢院寫付諸道采訪使傳布天下

唐會要曰天寶十四年四月內出御謨韻英五卷付集賢院繕寫行用

集賢注記曰上以自古用韻不甚區分陸法言切韻又未能釐革乃改謨韻英仍舊爲五卷舊韻四百二十九新加一百五十一合五百八十韻一萬九千一

百七十七字分析至細廣開文路兼通用韻以示宰
臣等上表陳賀付諸道令諸郡傳寫

陳氏延堅韻英

十卷見玉海

佚

南部新書曰天寶時陳延堅謨韻英十卷

顏氏真卿韻海鏡原

唐志三百六十卷

崇文總目
十六卷

佚

唐書顏真卿傳曰真卿字清臣祕書監師古五世從
孫博學工辭章事親孝開元中舉進士又擢制科調

醴泉尉再遷監察御史乾元二年拜浙西節度使代
以檢校刑部尚書爲朔方行營宣慰使未行畱知省
事更封魯郡公貶峽州別駕改吉州司馬遷撫湖二
州刺史楊綰薦之擢刑部尚書進吏部改太子太師
李希烈陷汝州遣眞卿往諭逼使上疏不從張伯儀
敗乃拘眞卿眞卿度必死乃作遺表墓誌祭文指寢
室西壁下曰此吾殯所也遂縊殺之年七十六贈司
徒諡文忠

又蕭穎士傳曰穎士子存字伯誠亮直有父風能文
辭顏眞卿在湖州與存及陸鴻漸等討撫古今韻字
所原作書數百篇

唐會要曰大曆十二年十一月二十五日刑部尚書
顏真卿謨韻海鏡原三百六十卷表獻之詔付集賢
院

王應麟玉海曰以包荒萬彙其廣如海自末尋原昭
之如鏡

按韻海鏡原崇文目僅存十六卷知亡佚已
多通志作鑑原避翼祖諱也是書爲後人韻
府之濫觴本無關小學以自來著錄皆列小
學中姑仍其舊後此韻府羣玉之類皆不入
焉

陸氏慈切韻

見董南一切韻指掌序

佚

李氏舟切韻

唐志十卷

佚

釋筭猷辨禮補修加字切韻

唐志五卷

佚

張氏參唐廣韻

通志五卷

佚

無名氏唐切韻

通志五卷

佚

李氏邕唐韻要略

通志一卷

佚

唐書文藝傳曰李邕字泰和揚州江都人父善有雅行淹貫古今爲文選注講授諸生四遠至傳業號文選學邕少知名始善注文選釋事而忘意書成以問邕邕不敢對善詰之邕意欲有所更善曰試爲我補益之邕附事見義善以其不可奪故兩書並行旣冠

見特進李嶠自言讀書未徧願一見祕書嶠曰祕閣
萬卷豈時日能習邪邕固請乃假直祕書未幾辭去
嶠驚試同與隱帙了辨如響嶠歎曰子且名家嶠爲
內史與監察御史張廷珪薦邕文高氣方直才任諫
諍乃召拜左拾遺御史中丞出爲汲郡北海太守李
林甫素忌邕因傳以罪杖殺之時年七十代宗時嶠
祕書監

彭氏蟾重修唐韻

見江西通志

未見

江西通志傳曰唐彭蟾字東瞻宜春人好學不仕以

處士稱著有重修唐韻

高氏

測韻對

唐志十卷

佚

王應麟玉海曰高測韻對十卷輯諸書爲千韻以便童習

按韻對唐志列於子部類書類然據玉海云輯爲千韻以便童習應歸之小學後倣此

陳氏

鄂

四庫韻對

通志二十八卷

佚

王應麟玉海曰乾德四年正月陳鄂上四庫韻對詔
續編天禧五年六月乙巳鄂之孫僧溥上鄂所作九

十八卷

范氏鎮國朝韻對

通志三卷

通考八卷
不著誤人

佚

郭氏遙音訣

通志八卷

佚

按龍龕手鑑嘗引郭說

句氏中正

有聲無字

一卷見宋史

佚

宋史文苑傳曰句中正字坦然益州華陽人孟昶時授崇文館校書郎復舉進士及第歸朝補曹州錄事參軍中正精于字學古文篆隸行草無不工太平興國二年獻八體書太宗召入授著作佐郎直史館被詔詳定篇韻改著作郎與徐鉉重校定說文太宗覽之嘉賞因問中正凡有聲無字有幾何中正退條爲一卷以獻上曰朕亦得二十一字可并錄之也

句氏

中正等雍熙廣韻

通志一百卷

佚

王應麟玉海曰太平興國二年六月丁亥詔太子中

舍陳鄂等五人同詳定玉篇切韻

志云雍熙中

太宗於便

殿召直史館句中正訪字學令集凡有聲無文者翌
日中正上其書上曰朕亦得二十一字當附其末因
命中正及吳鉉楊文舉等考古今同異究篆隸根原
補缺刊謬爲新定雍熙廣韻一百卷端拱二年六月
丁丑上之詔付史館

陳氏

彭年

等重修廣韻

通志五卷

存

景德敕牒曰大宋重修廣韻一部凡二萬六千一百九十四言注一十九萬一千六百九十二字準景德四年十一月十五日敕四聲成文六書垂法乃經籍之資始實簡冊之攸先自吳楚辨音隸古分體年祀寢遠攻習多門偏翊由是差譌傳寫以之漏落矧注解之未備諒教授之何從爰命討論特加刊正仍令摹印用廣頒行期後學之無疑俾永代而作則宜令崇文院雕印送國子監依九經書例施行牒至準敕故牒

又祥符敕牒曰元年六月五日敕道有形器之適物有象數之滋一爻始畫於龍圖八體遂生於鳥跡書

契是造文字勃興踵事增華觸類浸長沿賡載以變
本尙辭律之諧音集韻成書抑亦久矣朕聿遵先志
導揚素風設教崇文懸科取士考覈程準茲實用焉
而舊本旣譌學者多誤必豕魚之盡革乃朱紫以洞
分爰擇儒臣叶宣精力校讎增損質正刊修綜其綱
條灼然敘列俾之摹刻垂於將來仍特換於新名庶
永昭於成績宜改爲大宋重修廣韻牒至準敕故牒
陸法言誤本長孫訥言箋注儀同三司劉臻外史顏
之推著作郎魏淵武陽太守盧思道散騎常侍李若
國子博士蕭該蜀王諮議參軍辛德源吏部侍郎薛
道衡已上八人同誤集郭知玄拾遺緒正更以朱箋

三百字關亮增加字薛昫增加字王仁煦增加字祝
尚丘增加字孫恂增加字陳道固增加字更有諸家
增字及義理釋訓悉纂略備載卷中勒成一部進上
勅賜絹五百疋

晁氏公武讀書志曰廣韻五卷隋陸法言撰其後唐
孫愐加字凡四萬二千三百八十三前有法言長孫
納言孫愐三序

陳振孫書錄解題曰開皇初有劉臻等八人同詣法
言共爲撰集長孫納言爲之箋注唐朝轉有加增至
開元中陳州司法孫愐著成唐韻本朝陳彭年等重
修中興書目云不知作者按國史志有重修廣韻皇

朝陳彭年等景祐集韻亦稱眞宗令陳彭年邱雍等因陸法言韻就爲刊益今此書首載景德祥符敕牒以大宋重修廣韻爲名然則卽彭年等所修也

王應麟玉海曰景德四年十一月戊寅崇文院上校定切韻五卷依九經例頒行

又曰祥符元年六月五日改爲大宋重修廣韻三年五月庚子賜輔臣人一部景祐元年四月丁巳詔直史館宋祁鄭戩國子直講王洙刊修廣韻韻略命知制誥丁度李淑詳定祁等言多疑混字舉人誤用故也

又曰祥符元年六月五日詔曰道有形器之適物有